



Jadual Pembacaan Khutbah Jumaat

Siri 4/ 2024 (APRIL 2024)

ب	تاجوق	تاریخ
1.	Kunci Menemukan Lailatul Qadar	5 April 2024M/ 25 Ramadhan 1445H
2.	Kemanisan Yang Semakin Tawar	12 April 2024M/ 3 Syawal 1445H
3.	Ziarah: Satu Tuntutan	19 April 2024M/ 10 Syawal 1445H
4.	Syawal: Antara Kegembiraan dan Kepiluan	26 April 2024M/ 17 Syawal 1445H.
Khutbah Kedua		

دبیایای:



زكاة فؤلاو فینغ

دتریبتکن:



جابتن حال إحوال اکام اسلام فؤلاو فینغ

***Jawatankuasa Panel Semakan Teks Khutbah
Negeri Pulau Pinang***

- 1. SS Dato' Seri Dr. Haji Wan Salim bin Wan Mohd Noor
(Pengerusi)**
Mufti Kerajaan Negeri Pulau Pinang
- 2. YBhg. Ustaz Muhammad Fadzil bin Alias**
Pengarah, Yayasan Dakwah Islamiyah (YADIM) Pulau Pinang
- 3. YBhg. Ustaz Ahmad bin Hashim**
Penasihat, Pusat Pengajian Tahfiz Al-Quran (PPTQ)
Kolej Islam Teknologi Antarabangsa Pulau Pinang (KITAB)
- 4. YBhg. Ustaz Subki bin Mohamed**
Mantan Pensyarah Kanan, IPG Kampus Tuanku Bainun
- 5. YBhg. Dr. Mohamad Zaki bin Hj Abdul Halim**
Penolong Mufti, Bahagian Fatwa,
Jabatan Mufti Negeri Negeri Pulau Pinang
- 6. YBhg. Ustazah Rohayati binti Daud**
Mantan Penyelaras Program Intervensi Kaunseling,
Universiti Sains Malaysia
- 7. YBhg. Ustaz Ahmad Shahimi bin Senawi**
Pendakwah
- 8. Ustaz Mohd Hanif bin Omar @ Wahab
(Setiausaha)**
Ketua Penolong Pengarah, Bahagian Dakwah
Jabatan Hal Ehwal Agama Islam Pulau Pinang (JHEAIPP)





Kemanisan Yang Semakin Tawar

12 April 2024M/ 3 Syawal 1445H

أَلْحَمْدُ لِلَّهِ الْقَائِلِ: قُلْ إِنَّمَا أَنَا بَشَرٌ مِّثْلُكُمْ يُوحَىٰ إِلَيَّ أَنَّمَا إِلَهُكُمُ إِلَهُ وَاحِدٌ فَاسْتَقِيمُوا
إِلَيْهِ وَاسْتَغْفِرُوهُ ۖ وَبِئْسَ لِلْمُشْرِكِينَ ⑥

أَشْهَدُ أَنْ لَا إِلَهَ إِلَّا اللَّهُ وَأَشْهَدُ أَنَّ مُحَمَّدًا رَسُولُ اللَّهِ.

اللَّهُمَّ صَلِّ عَلَى سَيِّدِنَا مُحَمَّدٍ وَعَلَىٰ آلِهِ وَأَصْحَابِهِ أَجْمَعِينَ.

أَمَّا بَعْدُ، فَيَا عِبَادَ اللَّهِ، أُوصِيَنِي نَفْسِي وَإِيَّاكُمْ بِتَقْوَى اللَّهِ، فَقَدْ فَازَ الْمُتَّقُونَ.

وَقَالَ تَعَالَى: يَا أَيُّهَا الَّذِينَ آمَنُوا اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنتُمْ مُسْلِمُونَ.

PARA TETAMU JUMAAT YANG DIKASIHI SEKALIAN,

Di hari yang penuh kemuliaan ini, khatib menyeru agar kita sama-sama meningkatkan ketakwaan kepada Allah dengan melakukan segala suruhan-Nya dan menjauhi segala yang ditegah-Nya. Mudah-mudahan Allah memberikan kesihatan tubuh badan yang baik kepada kita semua untuk mencari rezeki yang halal dan melaksanakan ibadah.

Sebelum melanjutkan bicara, suka khatib memberi peringatan. Marilah kita tinggalkan perkara lagha yang bertentangan dengan sunnah serta adab, iaitu tindakan yang memesongkan perhatian daripada mendengar khutbah dan isi kandungannya. Ini termasuklah perbuatan



berbual-bual, tidur dengan sengaja dan bermain telefon bimbit. Mimbar pada hari ini akan membicarakan khutbah bertajuk: **“Kemanisan Yang Semakin Tawar.”**

MUSLIMIN RAHIMAKUMULLAH,

Kehadiran Ramadhan saban tahun meninggalkan kesan yang sangat mendalam kepada mukmin yang berjaya memanfaatkannya dengan amal ibadah. Pasti seorang mukmin mengharapkan agar hasil tarbiah takwa mampu membimbingnya dengan keimanan untuk menempuh cabaran sebelas bulan akan datang.

Ramadhan yang berlalu merupakan tapak untuk menyemai keimanan melalui tarbiah rohani dan jasmani. Ibadah dan kebaikan yang dilakukan dengan penuh ketekunan dalam tempoh tersebut, diharap akan mampu meninggalkan kesan di dalam diri dan jiwa kita. Namun sejauh manakah iman kita mampu bertahan dengan roh Ramadhan?

MUSLIMIN YANG DIRAHMATI ALLAH سُبْحَانَهُ وَتَعَالَى،

Adakah kita masih merindui Ramadhan? Pasti sukar dinafikan kerinduannya. Bermula dari sahur sehingga berbuka, ditambah pula dengan ibadah-ibadah di malamnya, kesemuanya detik terindah yang menghiasi sepanjang Ramadhan. Ada yang berjaya sampai ke penghujung ada yang sebaliknya.

Mungkin ramai di antara kita yang masih terus istiqamah dengan segala amalan kebaikan. Namun mungkin terdapat juga yang masih berada di takuk lama. Kesibukan dengan rutin harian di samping urusan keluarga, sedikit demi sedikit telah menurunkan semangat untuk



beribadah berbanding yang dimiliki di sepanjang Ramadhan.

Solat jemaah di masjid mula menjadi asing pada diri. Al-Quran perlahan-lahan dibiarkan tanpa dialunkan lagi. Jiran kurang disantuni, fakir miskin dan anak yatim juga kembali tidak dipedulikan. Seolah-olah ada batasan dan masa tertentu sahaja untuk mengerjakan ibadah dan kebajikan.

MUSLIMIN YANG DIRAHMATI ALLAH,

Kesempatan berpuasa di siang Ramadhan dan menghidupkan malamnya dengan beribadah selayaknya disyukuri oleh setiap hamba-Nya. Ia dapat dizahirkan melalui jalan istiqamah dan berpegang teguh dengan semua kebaikan yang pernah dilakukan sepanjang Ramadhan. Segala amal ibadah dan kebajikan tidak seharusnya diperkasakan sepanjang bulan Ramadhan sahaja, bahkan diteruskan sepanjang masa dan keadaan. Ini kerana, hakikat kehambaan tidak terhenti atau berubah dengan perubahan bulan dan musim bahkan sentiasa berterusan. Firman Allah **سُبْحَانَهُ وَتَعَالَى** dalam surah al Hijr ayat 98-99:

فَسَبِّحْ بِحَمْدِ رَبِّكَ وَكُنْ مِنَ السَّاجِدِينَ ﴿٩٨﴾ وَاعْبُدْ رَبَّكَ حَتَّىٰ يَأْتِيَكَ الْيَقِينُ ﴿٩٩﴾

Maksudnya: “Maka bertasbihlah dengan memuji Tuhanmu dan jadilah kamu dalam kalangan orang yang bersujud (solat). Dan sembahlah Tuhan kamu sehingga datang kepadamu perkara yang diyakini (kematian).”

Nabi juga mengingatkan kita tentang kepentingan istiqamah setelah melakukan suatu kebaikan melalui hadis yang diriwayatkan oleh Saidatina A'isyah رَضِيَ اللَّهُ عَنْهَا, sabda Nabi صَلَّى اللَّهُ عَلَيْهِ وَسَلَّمَ:

أَحَبُّ الْأَعْمَالِ إِلَى اللَّهِ أَدْوَمُهَا وَإِنْ قَلَّ

Maksudnya: “Amalan yang paling disukai oleh Allah سُبْحَانَهُ وَتَعَالَى ialah amalan yang berterusan (istiqamah) walaupun sedikit.”

MUSLIMIN YANG DIRAHMATI ALLAH,

Tanda penerimaan Allah سُبْحَانَهُ وَتَعَالَى terhadap sesuatu amal soleh itu ialah apabila terus diberi kekuatan untuk istiqamah mengamalkannya. Saidina Abdullah bin Amru رَضِيَ اللَّهُ عَنْهُ pernah diingatkan oleh Rasulullah صَلَّى اللَّهُ عَلَيْهِ وَسَلَّمَ:

يَا عَبْدَ اللَّهِ، لَا تَكُنْ مِثْلَ فُلَانٍ؛ كَانَ يَقُومُ اللَّيْلَ، فَتَرَكَ قِيَامَ اللَّيْلِ

Maksudnya: “Wahai Abdullah, jangan kamu mencontohi sikap si fulan itu, dahulu dia rajin menunaikan solat malam (qiyamullail) tetapi sekarang dia tidak lagi menunaikan. ﴿Hadis Riwayat Al Bukhari﴾

AYUH MUSLIMIN SEKALIAN,

Andai Ramadhan yang lalu kita sering berzikir dan mengingati Allah سُبْحَانَهُ وَتَعَالَى dengan membaca al-Quran sehingga khatam beberapa kali, mengapa selepas Ramadhan kita tidak mampu membaca dan menghayati lagi walaupun hanya lima minit sehari?



Ke mana hilangnya semangat dan laungan suara berselawat sepanjang Ramadhan? Keletihan dan kelesuan yang pernah dilalui seharian dapat ditempuh dengan penuh bertenaga, sayang kekuatan itu seolah semakin sirna saat Syawal menjelma. Surau dan masjid seolah-olah perlu merayu jemaahnya agar kembali hadir mengimarahkannya.

Tangisan yang pernah membasahi pipi di malam-malam terakhir Ramadhan seakan sudah kering, bahkan diganti dengan hilai tawa seolah pemergian Ramadhan adalah sesuatu yang sangat diharapkan. Takbir di pagi Syawal diharapkan menjadi permulaan kepada takbir kemenangan dan kejayaan. Namun apakan daya, takbir itu berubah menjadi petanda kelemahan dan kegagalan selepasnya.

MUSLIMIN YANG DIRAHMATI ALLAH,

Ketika Saidina Sufian bin Abdullah As Saqafi رَضِيَ اللَّهُ عَنْهُ bertanya kepada Rasulullah صَلَّى اللَّهُ عَلَيْهِ وَسَلَّمَ tentang suatu nasihat agar menjadi kunci kejayaan dan panduan dalam kehidupan lantas Rasulullah menjawab dengan ringkas dan padat:

قُلْ: آمَنْتُ بِاللَّهِ، ثُمَّ اسْتَقِمْ

Maksudnya: *“Katakanlah: Aku beriman kepada Allah سُبْحَانَهُ وَتَعَالَى، kemudian istiqamahlah.”* ﴿Hadis Riwayat Muslim﴾

Ketika salah seorang murid Sheikh Abdul Qadir al-Jilani bertanya kepadanya:



“Wahai tuan guru, selama hampir lima tahun aku berkhidmat padamu, belum pernah aku melihat sebarang karamah (perkara luar biasa) padamu?”

Kata Sheikh: “Aku berlindung kepada Allah *سُبْحَانَهُ وَتَعَالَى*, wahai fulan adakah pernahkah kamu melihat aku meninggalkan mana-mana kewajipan dan fardhu yang telah ditetapkan oleh Allah? “Tidak wahai guruku,” jawabnya. Kata Sheikh lagi:

فَالِإِسْتِقَامَةُ خَيْرٌ مِنْ أَلْفِ كَرَامَةٍ

Maksudnya: “*Istiqamah (dan berterusan melakukan kefarduan yang ditetapkan Allah itu) jauh lebih baik daripada seribu karamah.*”

Oleh itu, marilah kita menjadi hamba Allah *سُبْحَانَهُ وَتَعَالَى* yang sentiasa istiqamah melakukan amal soleh serta kebaikan, kerana Allah sangat mencintai hamba-Nya yang sentiasa memperbaiki ibadahnya dan istiqamah melaksanakan apa yang diperintahkan.

Marilah kita jadikan doa ini sebagai panduan agar ditetapkan hati untuk sentiasa istiqamah melakukan ibadah dan kebaikan.

يَا مُقَلِّبَ الْقُلُوبِ ثَبِّتْ قَلْبِي عَلَى دِينِكَ

Maksudnya: “*Wahai zat yang membolak balikkan hati, teguhkanlah hatiku di atas agama-Mu.*”

﴿ Hadis Riwayat at-Tirmizi ﴾

MUSLIMIN SIDANG JUMAAT SEKALIAN,



Mengakhiri khutbah pada hari ini, mimbar mengingatkan para jemaah kepada tiga pesanan berikut:

Pertama: Sentiasa ikhlaskan hati kepada Allah dalam melakukan ibadah dan amal kebajikan.

Kedua: Istiqamah dalam melakukan amal soleh tanpa membataskan masa.

Ketiga: Berdoa kepada Allah **سُبْحَانَهُ وَتَعَالَى** agar sentiasa ditetapkan hati dan keimanan agar roh Ramadhan sentiasa segar dalam jiwa.

Firman Allah **سُبْحَانَهُ وَتَعَالَى**:

فَأَسْتَقِمْ كَمَا أُمِرْتَ وَمَنْ تَابَ مَعَكَ وَلَا تَطْغَوْا إِنَّهُ بِمَا تَعْمَلُونَ بَصِيرٌ ﴿١١٢﴾

Maksudnya: “Oleh itu, maka tetap teguhlah kamu (wahai Muhammad) pada jalan yang benar, sebagaimana yang diperintahkan kepadamu dan hendaklah orang yang kembali kepada kebenaran mengikutmu berbuat demikian dan janganlah kamu melampaui batas. Sesungguhnya Allah Maha Melihat apa-apa yang kamu lakukan.” ﴿Surah Hud ayat 112﴾

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِهِدْيِ سَيِّدِ الْمُرْسَلِينَ،
أَقُولُ مَا سَمِعْتُمْ، وَأَسْتَغْفِرُ اللَّهَ لِي وَلَكُمْ، وَلِسَائِرِ الْمُسْلِمِينَ مِنْ كُلِّ ذَنْبٍ،
فَأَسْتَغْفِرُوهُ، إِنَّهُ هُوَ الْغَفُورُ الرَّحِيمُ.



Khutbah Kedua Bulan April

2024M/ 1445H

الْحَمْدُ لِلَّهِ عَلَى آلائِهِ وَإِحْسَانِهِ، وَالشُّكْرُ لَهُ عَلَى تَوْفِيقِهِ وَامْتِنَانِهِ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ تَعْظِيمًا لِسَانِهِ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ دَاعِيًا إِلَى رِضْوَانِهِ.
صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ، عَدَدَ خَلْقِهِ وَرِضَا نَفْسِهِ،
وَزِنَةَ عَرْشِهِ وَمِدَادَ كَلِمَاتِهِ.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى رَبَّكُمْ حَقَّ تَقَاتِهِ، وَاعْمَلُوا بِطَاعَتِهِ
وَمَرْضَاتِهِ، ثُمَّ اْعْلَمُوا أَنَّ اللَّهَ سُبْحَانَهُ وَتَعَالَى أَمْرُكُمْ بِأَمْرٍ بَدَأَ فِيهِ بِنَفْسِهِ؛ فَقَالَ عَلِيمًا
حَكِيمًا:
إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا

﴿الأحزاب: 56﴾

اللَّهُمَّ صَلِّ وَسَلِّمْ عَلَى عَبْدِكَ وَرَسُولِكَ مُحَمَّدٍ النَّبِيِّ الْبَشِيرِ النَّذِيرِ، وَالسَّرَاجِ الْمُنِيرِ،
وَارْضَ اللَّهُمَّ عَنْ آلِهِ وَصَحَابَتِهِ أَجْمَعِينَ، وَعَنِ التَّابِعِينَ، وَمَنْ تَبِعَهُمْ بِإِحْسَانٍ
إِلَى يَوْمِ الدِّينِ، وَعَنَّا مَعَهُمْ بِعَفْوِكَ وَكَرَمِكَ وَإِحْسَانِكَ يَا أَرْحَمَ الرَّاحِمِينَ.

SIDANG JUMAAT YANG DIRAHMATI,

Dalam kesempatan ini, mimbar ingin menyeru agar sama-sama kita menjadikan keselamatan diri, keluarga dan pengguna jalan raya yang lain sebagai keutamaan di sepanjang musim perayaan ini.



Menjaga keselamatan jalan raya dan berusaha mencegah dari berlakunya kemalangan jalanraya adalah sebahagian daripada *Maqasid Syariah* dalam aspek pemeliharaan nyawa dan harta.

Justeru kita mestilah berusaha dengan pelbagai cara untuk mengurangkan risiko dan mencegah daripada berlakunya kemalangan jalan raya sepertimana Allah berfirman dalam Surah Al-Furqan, ayat 63 yang bermaksud:

“Dan hamba-hamba (Allah) ar-Rahman (yang diredhai-Nya), ialah mereka yang berjalan di bumi dengan sopan santun dan apabila orang-orang yang berkelakuan kurang adab, hadapkan kata-kata kepada mereka, mereka menjawab dengan perkataan yang selamat dari perkara yang tidak diingini”.

Muslimin dan muslimat juga diingatkan agar tidak melakukan 7 kesalahan utama lalu lintas iaitu memotong barisan, memotong di garisan berkembar, tidak mematuhi isyarat lampu merah, memandu melebihi had laju, menggunakan telefon bimbit semasa memandu, tidak memakai tali pinggang atau topi keledar dan memandu di lorong kecemasan. Allah سُبْحَانَهُ وَتَعَالَى melarang para hamba-Nya yang beriman.”

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ،

اللَّهُمَّ اعِزَّ الْإِسْلَامَ وَالْمُسْلِمِينَ، وَدَمِّرْ أَعْدَاءَكَ أَعْدَاءَ الدِّينِ وَانْصُرْ مَنْ نَصَرَ الدِّينَ، وَاخْذُلْ مَنْ خَذَلَ الْمُسْلِمِينَ، وَأَعْلِلْ كَلِمَتَكَ إِلَى يَوْمِ الدِّينِ.

اللَّهُمَّ انْصُرْ إِخْوَانَنَا الْمُسْلِمِينَ وَالْمُجَاهِدِينَ وَالْمُسْتَضْعَفِينَ فِي فَلَسْطِينَ وَفِي كُلِّ مَكَانٍ، اللَّهُمَّ ثَبِّتْ إِيْمَانَهُمْ وَأَنْزِلِ السَّكِينَةَ فِي قُلُوبِهِمْ وَوَحِّدْ صُفُوفَهُمْ.

اللَّهُمَّ وَفِّقْهُمْ لِمَا فِيهِ عِزُّ دِينِكَ وَنَصْرُ شَرِيعَتِكَ، اللَّهُمَّ اجْعَلْهُمْ هُدَاةً مُهْتَدِينَ صَالِحِينَ مُصْلِحِينَ وَاشْمَلِ اللَّهُمَّ بِعَنَائِكَ وَتَوْفِيقِكَ عَلَى صَاحِبِ الْجَلَالَةِ،



Kebawah Duli Yang Maha Mulia Seri Paduka Baginda Yang di-Pertuan Agong, Sultan Ibrahim dan Kebawah Duli Yang Maha Mulia Seri Paduka Baginda Raja Permaisuri Agong, Raja Zarith Sofiah.

وَكَذَلِكَ صَاحِبِ الْفَخَامَةِ،

Tuan Yang Terutama, Tun Dato' Seri Utama Ahmad Fuzi Bin Haji Abdul Razak, Yang di-Pertua Negeri Pulau Pinang.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْغَلَاءَ وَالرِّيَاءَ، وَالرَّبَا وَالزُّنَا وَالزَّلَازِلَ وَالْمِحْنَ وَسُوءَ الْفِتَنِ مَا ظَهَرَ مِنْهَا وَمَا بَطَنَ عَن بَلَدِنَا هَذَا خَاصَّةً، وَعَنْ سَائِرِ بِلَادِ الْمُسْلِمِينَ عَامَّةً يَا رَبَّ الْعَالَمِينَ.

Ya Allah! Dengan sifat-Mu yang Maha Pemurah dan Maha Mendengar, jadikanlah kami dan keturunan kami orang-orang yang istiqamah mendirikan solat secara berjemaah serta dapat mengeluarkan zakat dan melaksanakan waqaf melalui agensi milik penuh Majlis Agama Islam Negeri Pulau Pinang (MAINPP) iaitu Zakat Pulau Pinang (ZPP) dan Wakaf Pulau Pinang (WPP).

Ya Allah! Berilah petunjuk-Mu kepada kami dan pemimpin-pemimpin kami untuk memberikan khidmat bakti yang terbaik kepada agama, bangsa dan negara. Ya Allah! Kuatkan iman kami agar dapat menghindari perbuatan khianat, salah guna kuasa dan harta, memberi atau menerima rasuah dan segala perbuatan durjana yang merosakkan kepentingan agama, masyarakat dan negara.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.
عِبَادَ اللَّهِ! إِنَّ اللَّهَ يَأْمُرُ بِالْعَدْلِ وَالْإِحْسَنِ وَإِيتَايَ ذِي الْقُرْبَى وَيَنْهَى عَنِ الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿٥١﴾ فَادْكُرُوا اللَّهَ الْجَلِيلَ
يَذْكُرْكُمْ، وَاشْكُرُوا عَلَى نِعَمِهِ يَزِدْكُمْ، وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ ﴿٥٢﴾

